

0+

"Поро пиалан улыт яндар шўман-влак:
нуно Юмым ужыт" (Мф. 5:8).


ШўМ-ЧОН ИЗОЛЫК

2013 ий март
годсек лектеш.

МАРИЙ-ПРАВОСЛАВНЫЙ ЖУРНАЛ 2-шо (106) №, 2022 ий февраль

Йошкар-Оласе да Марий Элысе Высокопреосвященнейший митрополит Иоаннын благословитлымыже почеш

20 январьште
Йошкар-Олан да Марий Элын
митрополитше Иоанн
Шочмо кечыжым палемден.



Озан олаште шочшо владыка Иоанн (Иван Иванович Тимофеев) кыдалаш школ деч вара Псково-Печерский монастырьыш илаш каен. 1978 ийыште Москосо духовный семинарийыш тунемаш пурен, вара ты олаштак Духовный академийым тунем лектын. Архимандрит саным налмеш Озан епархийыште служитлен.

1993 ий 25 июльышто Марий кундемыште епархийым ыштымеке, Москон да уло Русьын Святейший Патриархше Алексей II тудым Йошкар-Олан да Марий Элын епископшо лияш кидшым пыштен. Тиддеч вара владыка Иоанн (2017 ий гыч – митрополит) Марий мландыштына ўшанлын служитла.

Шочмо кечынже митрополит Иоанн Ежово селасе Мироносицкий монастырьыште Юмын литургийым эртарен. Тудлан Йошкар-Оласе епархиальный управленийын секретарьже иеромонах Серафим Пасанаев, монастырьын клирикше-влак иерей Михаил Лежнин ден протодиакон Михаил Козловский полшенят. Регент Татьяна Чернован вуйлатыме «Благовест» хор мурен.

Литургий деч вара владыка Шочмо кечыже лўмеш ятыр саламлымашым налын.



23 январьште Православный Черке святитель Феофан Затворникым пагален шарна.

Тиде кечын Волжск ден Шернурын епископшо Феофан (Данченков) имениным палемден – тудо тиде святой лумеш 1995 ий 22 январьште үп пүчмө йўлам эртен. Пылпомышысо аралтышыже семынак владыка Феофан Юмылан служитлыме пашажым пенгыдын да икшырымын шуя.

18 январьште Марий митрополийын духовникше, Юмын Шочыктышо Пеш Святой Аван Шочмыжо лумеш черкын настоятельже архимандрит Иоанн Барсуковлан 93 ий темын.

Иоанн ача (Иван Кузьмич Барсуков) Ульяновск областыште шочын-кушкын. Аваж ден ачаже черкыште муреныт. Курыкмарий район Сумки селасе черкыш 1965 ийыште толын да тачысе кече марте Юмылан да калыклан уло чонжым пыштен служитла. Шке ийготшым ончыде, нойымыжым шотыш налде, тудеке мийыше еҥ-влакым ўшанле энгертыш семын поро мутшо дене лыпландара, чын корныш шогалашышт полша. Тудын йоратымашыже, чон волгыдыжо да порылыкшо чылашлан сита. Калыкат шке духовникшым пеш пагала да йората.


А 2017 ий 18 ноябрьште Москон да уло Русьын Святейший Патриархше Кирилл тудым – Рязань кундемысе Скопинский епархийын клирикше, Николо-Чернеевский пörьен монастырьын настоятельже игумен Феофаным – Волжск ден Шернур у епархийын епископшо лияш кидшым пыштен.

Ушештарена: ты епархийыш Волжск ола, Волжский, Морко, У Торъял, Кужэңгер, Параньга, Шернур, Марий Турек район-влак пурат.



Шке пайремыштым палемдыше митрополитна Иоаннлан, епископна Феофанлан, архимандритна Иоаннлан пенгыде тазалыкым, шўм-чон да капкыл куатым, куштылго огыл служенийыштышт Юмын полшыжым тыланена. Кужу курыман лийза!

ПОРЫЛЫКЫШТО ЮМО ДА ЮМЫН ШҰЛЫШЫЖӖ



Волжск районысо Памар селаште верланыше Святой Троице лүмеш черкестений изирак лүмгечыжым палемда. Приходым угычын почмо деч вара икымше Литургийым служитлымылан – 15 ий. «Черке» манашыжат неле, вет тошто черкын оралтыжым колымшо курымын кудлымшо ийлаштыже шүтен-ирен пытарыме. Лач колокольнын кумыт гыч кок ужашыже аралалт кодын. Тудыжат жап эртыме дене шолдыргаш тўнгалын, а тўрлаташ пеш шуко шийвундо кўлеш. Приходын кызытсе жаплан тыгай йӧнжӧ уке. Туге гынат ойгыраш огыт тўнал: Юмылан кўлеш гын, Юмо чыла ыштен кертеш.

А мый шوماкем вес велкыла савыралнем. Юмын пўрымыж дене 1999 ийыште Памар селаште черке пелен угыч приходым почмо. Калыклан юмылташ верым аптекин кермыч дене нӧлтымӧ тошто оралтешыже йӧнештарыме. Икымше старостыжо Виталий Александрович Федотов лийын. Кугурак пайрем годым службым эртараш пошкудо черкыла гыч батюшка-шамыч толеденит.

2006 ий 20 ноябрь гыч тўнгалын Йошкар-Олан да Марий Элын владыкаже, тунам архиепископ, а кызыт митрополит Иоаннын кўштымыж дене Памар черкын шкенжын настоятельже уло. Мый, иерей Сергей Петров, тиде пашам уло кумыл дене шукташ толынам. Декабрыште шуматкече да рушарня еда молебеным эртаренна. 2007 ий 6 январыште икымше гана Юмын литургийым служитлышна. Юмылан тау, латвич ий жапыште Литургий кўрылтде эртаралтеш. А Литургийже черкыш толшо-влакым веле огыл, черке пеленысе уло калыкым, пўртўсым, кайык ден янлыкым Юмын шўлыш дене святитла.

Памар села покшелне келге да яндар вўдан, пеш сылне Ошкуп ер верланен. Тушко икымше гана 2007 ий 19 январыште, Крешене пайрем кечын, Литургий деч вара Крестный ход дене

вўдым святитлаш миенна. Тудо ийын теле пеш леве ыле, сандене вўд кылмен огыл. Ме вўдым сер гыч гына святитленна. 2008 ий гыч тўнгалын пеш сай йўлам почна, кудыжым Юмын полшымо дене кызытат шуена. Ошкуп ўмбалнысе ийым бензопила дене ырес семын пўчкына, тўнгешыже йўштылаш верым кельштарена. Ончыч пурен лекташ тошкалтышым шогалтенна гын, кызыт кўртнӧ гыч ыштыме да онга дене обшиватлыме (ковыжлымо) кышкарым вўдышкӧ волтен шындена. Пурен-лекташ нимогай лўдыкшӧ уке. Вургемым кудаш-чияш йӧнештарыме верым воктенак чонен шогалтенна. Тудым пеш вашке рончен налаш лиеш. Вўд гыч лекмеке, йол кылмен ынже пиж манын, йол йымаке олымым да кож да якте (пўнчӧ) укш-влакым шарена. Чыла йӧным ыштыме, йўштылаш гына кумылда лийже.

2008 ийыште тиде пашам икымше гана уло-укежат визытын ыштенна. Эн кугу эгертышем Василий Григорьевич Кудрявцев лийын. Кызытат тудо тиде пашалан мутым куча. Тунам мыланна кум илалшырак ег полшен: Виктор Дмитриевич Власов, Мария Алексеевна Петрова, Ксения Петровна Павлова. Жап эртыме семын Юмын полшымыж дене самырык-влак кумылангынит. Теният Василий Григорьевичын тўн полышкалышыже Василий Николаевич Зайцев дене пырля Саша Шатов, Валентин Харитонов, Антон Спиридонов, Дима Кузьмин, Сергей Тимофеев, Григорий Лебедев, Роман Ласточкин, Роман Федоров, Кирилл Иванов лийынит. Нунылан кугу таум каласем. Ончыкыжымат сай пашам шукташышт Юмо полшыжо.

Ме чыланат илышыштына поро пашам шуқырак ыштышаш улына. Вет порылыкышто Юмо да Юмын Шўлышыжӧ. Тудо чонышкына куаным, ласкалыкым, волгыдым пурта.

Иерей Сергей ПЕТРОВ.
Екатерина АШКЕЛЬДИНАН фотожо.

ТЕК УТЛАРАК ЙОЧА УШНА



Волгыдо Рошто пайремым чыла православный калык жапла. Кугыен-влак кўдыратле улмыжлан да пўтын мучашлалтмыжлан тудым йўратат, а йоча-влак У ий пайремым вучымо семынак вучат, вет Рошто годым нуно пўлекым налыт, канат, модыт. А пайремым сылнын сўрастарыме кож воктене чылан пырля эртараш гын, тудо кужу жаплан ушеш шындаралт кодеш.

Юлсер кундем Моркыял селасе Юмын Аван Казанский иконыжо лўмеш черкыште 7 январьыште Рошто ёлко икымше гана эртен. Тушко Моркыял, Красный Горко, Приволжский посёлко, Волжск ола гыч ача-авашт дене пырля йоча-влак, изижат, кугужат, чумыргеныт. Нунын дене пырля начар тазалыкан икшыве-шамычат лийыныт.

Пайремыш толшо Йўштў кугыза чылаштын кумылыштым нўлталын, а йоча-влак тудлан почеламут-влакым лудыныт. Пытартыш ийлаште Моркыял приходышто службым эртарыше иерей Сергей Першаков саламлыме мутым ойлен:

– Уло шўм-чон дене тендам Рошто пайрем дене саламлем. Тек чоныштыда йўратымаш, ўшанымаш эре илат, тек тўняште шуко поро паша ышталтеш, родо-тукумда, лишыл егда-шамыч таза лийышт. Суксыда-влак тўрлў ойго да энгек деч тек арален шогат, а Христос Юмына тек кажне поро пашанам святитла.

Мучашлан Йўштў кугыза кажне йочалан шере пўлекым кучыктен да чылаштым трапезныйыш чайым йўаш ўжын.

Икшыве-влаклан 30 пўлекым шке оксашт дене Приволжский посёлкысо самырык-шамыч налыныт. Ончыкыжымат нуно ялысе йоча-влаклан пўлекым налаш полшаш сўреныт.


– Тиде пайремым посёлкысо самырык ег да прихожан-влакын тыршымышт дене эртарен колтен кертмыланна моткоч куаненна. Черкын историйже ўрыктарыше да тыгодымак изиш

кумылым волтышо, – каласен Йўштў кугызан рольжым модшо Денис Смирнов. – 1895 ийыште Моркыялыште черкым пырня гыч чоненыт, но 1964 ийыште тудо йўлен каен. Кызыт верысе калыкын вийже дене олмыштыжо йошкар кермыч гыч у черкым нўлтымў. Тудын куполжо торашке коеш. Моткоч кугу куан, кунам ялысе йоча-влак черкыште, погынен, Рошто пайремым пайремлат. Шукынжо черкылан идалык мучко полшат: пум нумалыт, шудым салат, йыраглаште шўкшудым сомылат, тельым кудывечым лум деч эрыктат да моло сомылымат шуктат.

Тек храмыште Рошто пайремым эртарыме йўла умбакыже шуйна да эшеат утларак ялысе йочам пырляшке уша.



ЧЫЛА ОСАЛЖЕ АЙДЕМЫН КӨРГЫЖ ГЫЧ ЛЕКТЕШ



Святой Иоанн Златоустын мощыжым кусарыме кечын священник Григорий Дьяченко шүдө ий утла ончыч тыге туныктен ойлен. Тудын туныктымыжо тачысе кечыланат лачеш толеш.

Ме таче уло тўнялан кугу туныктышо да святитель уло Иоанн Златоустын мощыжым кусарыме кечым палемдена. Тудо Святой Возымашым келгын умылтарен, черке службо радамым шотыш конден, шке мастарлыкшылан көра Златоуст лўмым сулен налын.

Ты святой айдеме 367 ийыште Антихий олаште поян ешыште шочын, чапле шинчымашым налын. Ончыкыжым кугу шанчыенат лийын кертын, но тудо мландымбалысе чап деч корангын, шкенжым черке службылан пуэн. Ончыч шке олаштыже черке пресвитер, а вара Константинопольын архиепископшо лийын. Илышыште тудо мо улыж дене серлаген, нужна-шамыч верч чот тыршен. Туныктен ойлымыж годым поян-шамычым пешкыде шўман улмыштлан шылтален, укеан еглан полшаш ўжын, тидыже төра-шамычлан келшен огыл. «Иоанн Златоуст кугыжан еш нерген удам ойла» манын, нуно император Феодосийын Евдоксия пелашыжым святой ег ваштареш шыдештареныт. Шоялан ўшанен, святительым 404 ийыште ончыч Арменийысе Кукуз олашке ссылгыш колтеныт, а кок ий гыч Абхазийыш кусараш каласеныт. Кўштымө верыш толын

шуде, 407 ий 14/27 сентябрьыште тудо Коман олаште колден, шўлышыжө лекме годым каласен: «Чыла верчат Юмылан тау».

Тудо жапыште Константинополь олан архиепископшо Прокл (Иоанн Златоустын тунемшыже) ончычсо кугыжан эргыже, император Феодосийлан Иоанн Златоуст нерген чыным каласен да мощыжым Константинопольыш кондаш йодын. Мощым нангаяш толшо-шамыч святительын капшым вер гычат тарватен кертын огытыл, сандене император тудлан илыше еглан возымо семынак серышым возен, шке олашкыже поро кумылын толаш ўжын. Ты серышым святительын кидышкыже кучыктеныт. Святительын капшым кондымеке, ончылныжо кугыжа шортын кумалын, шке аважын сулыкшым проститлаш йодын.

Айста ынде шоналтена: Иоанн Златоустын чапле служенийже молан көра кўрылтын? Тудын ўмбакаш шоям ойлымылан огыл мо? А вет тиде сулык мемнан жапыштат чот шарлен. Шоям шаркалаш куатым айдеме тукумын тушманже – сатана – пуа, тудо чыла шоян ачаже. Тудо айдемын осал кумылшупшмашыже шуко улмын пала. Ег-шамыч коклаште ваш сырымаш, көранымаш, икте-весым ужмышудымаш уло гын, тидым аяр семын кучылтеш. Сатанан кумылжо почеш ыштыше ег-

шамыч псаломышто пеш ожнак қаласымым шуктен илат: «Йылмыштым кишке йылме гае пўсемденыт, умшаштышт – аспид кишкын аярже» (Псал. 139:3).

Христиан обществыште ваш йоратымаш уло гын, тыгай осаллан вер лийшаш огыл. Но, иза-шольым-шамыч, мемнан коклаште йоратымашыже уло мо? Ег нерген шоям ойлымо, лушкыдылыкшо нерген

шомакым шарыме, поро пашажымат осалыш савырен ончыктымө – чыла тиде мемнан койыш-шоктышыш шынген, вор семын илышышкына пурен. Тиде осал койыш могай гына йўным ок кучылт, могай гына волгыдо вургем дене ок леведалт? Властын кўштымашыжым шемемда, закон почеш илымашым тудо «айдемын эрыкшым шыгыремдымаш» манеш. Шке пашажым тыршен ыштыше ег ўмбакаш вуйлатышылан шоям ойла.

Ўмбагыже – 6-шо лаштыкыште.



Ваш йоратен илыше вате-марий коклаш пурен, икте-весылан ушаныдымашым шочыкта.

Господь Иисус Христос ойлен: «Айдемын көргыж гыч мо лектеш, тудо айдемым амырта. Көргө гыч, айдемын шүмжө гыч осал шонымаш, жарланымаш, ег вате дене коштмаш, пуштмаш, шолыштмаш, опкынланымаш, осаллык, ондалымаш, вожылдымаш, көранымаш, мыскылымаш, кугешнымаш, ушдымылык лектыт. Чыла тиде осалже айдемын көргө гыч лектеш да тудым амырта» (Мк. 7:20-23).

Вес ег үмбаке осалым ойлыштшо ег айдемым пуштшо деч сайрак мо? Иктыже капым пытарынеже гын, весыже айдемын духовный, нравственный илышыжым укешке луктеш. Вор иктаж арверым шолыштеш гын, клеветник егын поро лүмжым шүктара. Яжарланыше шке лавырашкыже шупшеш гын, шояк ег шке аяржым весын үмбаке колта.

Историйыште тугаят лийын, кунам шонгыенгы чалемше вуйжо, вуйлатышын ончычсо поро пашаже, священный сан, аван йоратымашыже але ўдырын нарашталыкше южгунам кугу преступникымат осал пашам ыштыме деч чарен шогалтенит. А шоям ойлыштмашым нимо ок чактаре, нимо ок лүдыктө – тудо Юмын Эргымат чаманен огыл!

Иза-шольым-шамыч, молан вара тиде осал койыш тыге чот шарлен? Айдемын капышкыже пижаш манын, шучко чер тушто шкаланже лушкыдо верым муэш, тыгак ег-шамыч коклаште поро ден осал нерген умылымаш лушкыдемын да тудо пырче ден арвам лугаш тўналыныт гын, осал койыш чот шарла.

Утарыше Христос ег-шамычлан Юмын да икте-весым йораташ күштен. Ме кызыт тидым шуктена мо? Лишылна-шамычын поро лүмыштым аралена мо? Ончалза тебе, палымынам вашлиймеке, «Могай увер уло?» манын йодына. Уверым лончылымаш гычак ме еглан уда акым пуаш тўналына. Шинчал деч посна кинде тамым от шиж, маныт, а ме уда шомак деч посна мутланен она мошто да эше жапым арам эртарена. Апостол Павел оила: «Иза-шольо-влак, ушда дене йоча гай ида лий. Осаллык шотышто аза гай лийза, а ушда дене – кушкын шушо» (1Кор. 14:20). Егын осалжым шарыше йўксавыш лийме деч шкендам аралыза. Мыланна Утарыше Христосын күштымыжым шарныман: «Ида судитле, да шкеат судитлыме ода лий».

Егын осал шомакше дене ойгандаралтше шольым! Тыланет кызыт пеш неле гынат, пенгыде лий! Шке поро пашатым эшеат чот тыршен ыште. Кажне христианин чыла нелылыкым сенгышаш. Шарне: тыйым порын аклыше ег-влак улыт, нуно тылат улыш кидым шуялтат, лүддымө лияш, нелылыкым сенгаш куатым пуат. Чыным почын ойлымет годым шкендым кучо, осалым ит ойло. Тыланет чот неле лийме годым Юмын Эргын орланымыз нерген шарне. Ег-шамычын осалышт да шойышт ойлымышт Тудым Ыресеш пудалыме марте шуктенит гынат, Тудо ваштареш нимогай осалым ойлен огыл, эше нунын верчак кумалын: «Ачай, титакыштым кудалте, нуно мом ыштат, огыт умыло» (Лк. 23:34). Аминь.



ШОЧШЫДА-ВЛАК ВЕРЧ ЮМЫН ОНЧЫЛНО МУТЫМ КУЧЕДА

Еш кокласе кыл, йочам куштымо йодыш айдеме тукумым курымла дене тургыжландарат. Тидын нерген ятыр ойлымо, возымо. Таче тыланда, пагалыме йолташ-влак, архиепископ Лукан (шке лүмжө – Валентин Феликсович Войно-Ясенецкий) туныктен кодымыжым лудаш темлена.

– «Шекланыза, нине изирак-влак кокла гыч чыланыштымат пагалыза» («Смотрите, не презирайте ни одного из малых сих») (Мф. 18:10). Христосын нине мутшо-влакым шарнеда мо? Нуно лач тыланда каласалтыныт манын шоналтенат огыдал дыр? Тыгай ончышаш «изирак-влак» тендан вара укеак улыт мо? Кочо шинчавүддам йоктараш таратыше шала койышан ўдырда ден шолышташ тунемше да осалланыше эргыда-влак шагал улыт мо? Паледа, молан тыге: те Христосын «Шекланыза, нине изирак-влак кокла гыч чыланыштымат пагалыза» манын каласыме мунло мутшо-влакым огыда шарне, сандене. Кунам йочада-влакын шкеныштым шотдымын кучымыштлан верч тыланда пеш йөсө лиеш, тунам гына те шортын-шортын Юмылан кумалыда. Но сөрвалымыда улыш деч посна кодеш. Те шочшым ончен куштымо обязанностьдам Юмын вачымбакыже пыштенда, сандене тыге. Тарзе шке пашажым озажлан ыштыкташ төча гын, оза олмешыже шукташ тўналеш, шонеда? Тарзе тыгай койышыж дене озажым сырыкта гына. Теже тугеже Юмо деч мом вучеда?

«Шке йочаштым христиан вера почеш куштымым күлешлан шотлыдымо ача-ава-влак икшывым пуштшо ег дечат кугун законом пудыртат: икшывым пуштшо ег чоным кап деч ойыра гын, нуно чонымат, капымат орлыкан тул лонгаш кудалтат», – тебе могай лүдыкшө мут-влакым оила святитель Иоанн Златоуст. Тыгай ача-ава-влаклан Юмын ончылно мутым

Умбаке – 7-ше лаштыкыште.

кучашышт пеш неле лиеш...

А кө уло кумылжо дене йочажым поро шүмчонаным кушташ тырша, тыгай-влакым моктен, кажне эр службышто 102-шо псаломышто муралтеш: «Юмын порылыкшо Туддеч лүдшөшамычлан курым гыч курымышко лийын шога, Юмынчынже Тудын сугыньжым аралышеда Тудын кўштымашыжым шукташ шонышо-шамычын эргыштын эргышлан лиеш» (Пс. 102:17-18).

Ынде шоналтыза, шочшыдам христиан шўлышеш огыда кушто гын, Юмо ончылно мутым кучашда могай чот неле лиеш. Вашештыза мылам: самырыкше годым шкенжым шала кучышо ўдырда марлан лектеш, йочам ышта, ончыкыжым мо туддене лиеш? Юмын поро шўлышыжō тиде еш ўмбаке возеш мо? Уке, тудо Юмылан йōрдымō тукымлан тўналтышым пышта.

Икшывым кузе куштыман?

Икымше курымласе христиан-влак кузе куштеныт, тугакак. Нуно йочаштым изинекак молитвам лудаш, черкыш кошташ, пўтым кучаш, черке таинствым эрташ туныктеныт, Святой Возымаш почеш шинчымашым пуэныт. Молитвам лудде, йоча ўстел коклаш кочкаш шичшаш огыл улмаш, онгым ыреслыде, нигō нимогай пашам тўналын огыл.

Икшывым философийлан, музыкылан, сымыктышлан туныктеныт гынат, святой правилым шотыш налыныт: «Тудым пиалдымылан шотло, кө чыла пала, но Юмым огеш пале; поро пиаланлан тудым шотло, кө молым нимом огеш пале, а Юмым пала». Йочалан мирской наукам туныкташ чарыме манын ида шоно, мемнан кугу туныктышына-влак самырыкышт годым философиймат, музыкымат сайын тунемыныт. Святитель-влак Василий Великий, Григорий Богослов да Иоанн Златоустат пеш кугун тунемше лийыныт.

Тенданат йочада-влаклан кугун тунемше, келге шинчымашан лийман. Но наукам шымлен шогымо деч посна тек кўшыл чыным, Юмын Законжым да Юмын кўштымашыже-влакым, пален да шотыш налын илат. Тунам гына нуно илыш корныштышт огыт йом.

Те шкежат койышда дене йочаланда пример лийшаш улыда. Ойлымо да туныктымō шагал, йоча ача-авам ончен тунемеш. Шкеже шала илышым иледа, шолыштыда, вурседылыда, кучедалыда, енгым мыскыледа гын, йоча тидым огеш уж, шонедат? Нунат вес гана тыгак ыштат. А те тыге туныктымыландат Юмын ончылно пеш нелын мутым кучаш тўналыда.

Тўнямбалсе туныктышо да черке проповедник-влак кокла гыч ик эн пагалыме святитель Иоанн Златоуст шочшыштым шкешт да поянлык верч гына азапланаш туныктышо ача-ава-влак нерген тыге ойлен: «Теже пўито икшывыдам

лўмынак пытараш тōчымō семын нунылан тудым ышташ кўштеда, мом ыштымылан көра утаралташ нигузе огеш лий... Йочадан тарзыжат, имньыжат, эн чапле вургемжат лийже манын, чот азапланеда, а шкеже сай айдеме лийже, чонжо шōртнō лийже манын, ынедат шоналте».

Иоанн Златоустын тўжемаат пеле ий ончыч каласыме нине чын мутшо-влакым тачат ушештараш лиеш. Тачат йочада-влакым Юмо деч лўдын илаш ода туныкто, а нунын поян, виан, палыме ег-влак радамыш логалшашышт верч ятыр вийдам пыштеда. Кўлеш мо тиде? Уке.

Йочам ажаж годымак туныкташ тўналман. Нунын шыште гай пушкыдо чонышт чыла шупшеш: сайжымат, осалжымат. Святой Тихон Задонский икшывын чонжо нерген тыге ойлен: «Изи

пушентгым кузела тайныктарет – тугела кушкеш. У атыш могай вўдым темет (тамле пушаным але шопышым) – көргыжō туге ўпшаш тўналеш». Йочан чонышкыжо Христослан ўшанымашын тамле пушыжым темет гын, тудо шкежат ты тамле пушан улмыж дене калык коклаште ойыртемалташ тўналеш, тендан куанда, чондам лыпландарышыда лиеш...

Эше тидымат мондыман огыл: йочам логалтен налде (наказатлыде) кушташ огеш лий. Ача-ава-влак, кудышт йочаштым чот йōратат, мом йодмыштым чыла шуктат, уто-сите койышыштым уждымыла койыт, нуно пеш кугу йонгылышым ыштат. Руш святитель Тихон Задонский ача-ава-влакым тыге туныкта:

«Самырык, туныктыдымо да шке илышышт дене илаш тўналше-влак кычкыдыме имне гаяк улыт. Сандене, христианин, шочшет-влакым йōрате, кўлеш годым логалте. Тек нуно рвезе улмышт годым кап корштымым шижыт, уке гын нунын кушкын шумекышт тыйын шўмет коршташ тўналеш. Тек нуно тыйын логалтымет дене шортыт, уке гын вес гана тый нунын верч да нунын логалтымышт дене шорташ тўналат. Чылажат икшырымын лийшаш». Икшывым сырен, ужмышудымын наказатлаш ок лий, тудлан ушышкыжо шынгаралтше манын логалтыман. Тунам шочшыда-влак молан көра логалтым умылат, тиддеч пайдам налыт.

Ужыда, могай кугу задаче ача-ава ончылно шога. Икшывыдам ушан-шотаным, Юмым жаплышым кушташ огыда тырше гын, вес гана нуным ончен шорташ, орланаш тўналыда, да Юмын ончылно мутым кучеда, уло тукымда ўмбаке Юмын шыдыжым тарватеда. Икманаш, шочшыда-влак верч эреак азапланыза, нунылан яндар, святой, пагалымашым сулышо примерым гына ончыктыза, тунам Господьын благословенийже курым гыч курымыш тендан да йочада-влакын ўмбалне лиеш. Аминь.



ЎМЫРЕШЛЫК УРОК



Уныкажым Прасковьян туге почкалтарен налмыже шуо, тек тудыжо ўмырешыже шарнаш тўналеш. Ух, пушкыдо вержым тул ылыжмеш ырыктен колташ ыле, Петяжын ты вержым йўштў вўдыш пурен шинчын йўкшыктарымеш ситыже!

Петька ден тореш пылышан Ванька йолташыжын кинде суқырым чумен толмыштым Прасковья окна гыч ужо. Иктыжын сумка кылже кўрлынат, кинде лектын возын. Весыже тудым йолжо дене шўкалын. Тыге мече олмеш киндым чумен модаш тўналыныт.

Мом чумымыштым умылымеке, Прасковья шке шинчажлан ыш ўшане. Кычкырен куржын лекнеже, но йолжо ок кай, ик верыштак веле тошкыштеш. Ончыч кўргыж гыч йўк лекте, но логарысе моклака чараш йонгалташ ыш пу. Уремыш тудо умшам карен, южым кўргыш налаш тўчышў кол гай лектын шуо. Кок йолташлан кўргў йўк дене ойлен керте:

– Тидыже кинде, вет тудо святой! Кузе тыге?!

Кок эрге менге гай тўнгын шогале. Прасковья сукалтен шинче, киндым кидыш налын шортын колтыш. Вара кынелын, киндым онжо пелен ўндалын, эркин мўнгў ошкыльо. Фёдор эргыже аважын вийдыме улмыжым ужын, мо лиймым йодо, но лавырген пытыше кинде суқырым ужын, вашмут деч поснат умылыш. Йолашыж гыч кўзанўштыжым шупшыльо, уремыш лекте. Прасковья Петькан кычкырен шортмыжым кольо, но молгунамсе семын арален налаш ыш вашке.

Шортын пытыше уныка пўртыш куржын пурышат, вигак конгамбаке кўзен кайыш. Ачаже пенгыдын пелештыш: «Таче кече деч вара Петр кинде деч посна кочкаш тўналеш. Кеч-момат! Лемым, котлетым, пучымышым – чылажымат, кинде деч посна! Чай але шўр тыгакак булка, клендыр деч посна!» А кастене Ванькамыт деке миен, могай чапле «футболистым» куштымышт нерген каласаш сўрыш. Ванькан

ачаже комбайнерлан пашам ышта, тудыжо тыгай «модшын» йолжым писын кўчыкемда. А кочаже Сталин жапыште ик суқыр киндылан лу ий лагерьыште шинчен, сандене уныкажым «мокталтыде» ок код.

Прасковья кўэшт лукмо шокшо киндым ыресла, шупшалеш, вара веле шулаш тўналеш. Кевытыште киндым шагал годым налыт, шешкыж дене икмынар кугу суқырым иканаште конгаш эреак шке кўэштыт. Киндыже тыгай пушкыдо, тутло таман лиеш. Пўрт мучко шуко жаплан кинде пуш шарла. Варажат пўчкын налын, пурлын ончымо шуэш.

Фёдор чынжымак кастене Ванькамыт деке кайыш. Пеленже лавыраш пўрдалтарыме кинде суқырым нале. Пошкудо-влак кас кочкышым ышташ тарваненыт. Кондымо киндым ужын, ўрмалген колтышт. А Ванька мом ышташат ок пале, шокшо тулшолыш логалше гай тарванылаш тўнале. Кочаже пылышыжым пўтыралын, вашке лыпландарыш.

Мо кузе лиймым Фёдор кўчыкын умылтарыш. Шуко шоныде, Мичка коча кондымо суқыр гыч кугу шултышым пўчкын налын пелештыш:

– Тиде киндым Иван кочкаш тўналеш. Таче веле огыл, а суқырым кочкын пытарымешке, тунам веле вес киндым налын кертеш.

Шкеже тунамак уныкажын кидше гыч киндым поген нале да нер йымакшак лавыргыше шултышым пыштыш.

Петя эрдене кинде деч посна кочко. Ачажын мутшым сайын шарнен кодын. Адакшым йўратыме коважын носки йолын куржын лектын шортын сукалтымыже кызытат шинча ончылныжо. Тудлан моткочак намыс. Кузе кова деке лишемаш, прощенийым йодаш – ок пале.

Прасковья уныкажым пуйто ок уж. Ончыч эрдене кочкаш пукшаш тыршен гын, кызыт пучымышым ик мут деч посна пыштыш, ончыкыжо шўрым стаканыш темен шындыш,

но киндым ыш пыште.

А Ванька школыш миен шумеш шортшаш гай ошкыльо. Умшаштыже ошма пытыдымн кочыртатен. Лавыран киндым вашкерак кочкын пытараш полшаш йолташыжым үжө. «Орадыжак омыл, мылам күзанүштө логалмат ситыш», – вашештыш Петя.

Кастене Петя коважым толын өндаде, а коваже кузе шинча ыле, тугакак шинчен кодо. Петя визытан оценкыжымат ончыктыш, задачым кузе ыштымыж нергенат каласкалаш төчыш, но тудыжо сонгыра гай веле, пуйто нимат ок кол. Уныка коваже ончылан сукалтен шинче, эн йоратыме, эн поро, эн ныжылге аралышыжым өндаднеже ыле. Прасковья рвезын вуйжым кидше дене нөлтале да шинчашкыже ончале. Петр тиде ончалтышым үмыр мучко шарнаш тунгалеш. Корштымаш, өпкелымаш, чаманымаш – чылажат ик ончалтышыште.

Прасковья уныкам пеленже шынден, каласкалаш тунгале:

– Шарне, йоратыме уныкам. Илышыште тыгай лодем уло, кудыж гоч нигунамат, нигузеат вончен каяш огеш лий: шонгемше ача-авам пагале, янлыкым ит орландаре, Шочмо элым ит ужале, Юмым ит вурсо, ит сырыкте да киндым акле. Мыйын йоча пагытем каргыме сар жапыште эртен. Тунам да варажат ик шонымаш дене иленам: киндым шер теммеш кочкаш. Яндар киндым, почкалтыш, коншудым ешарыманым огыл, а пырче гыч ыштыме киндым. Шкежат тыгай киндым күзшаш шоненам. Ожно годсек пагалыме унам але самырык ешым кинде-шинчал дене вашлийыт. Киндым чумалаш – аван шүргыш шүвалме дене иктак. Сар годым күчызылан изи шултыш киндым пүчкын пуэт, а тудо кидетым шупшалеш. А те – йол дене. Тыйже вет изи отыл, книгам лудат, вуйыштетше вуйдорык олмеш олым кия мо? Ме ондак эсогыл кинде пудыргым акленна. Сукалтен, Юмо дечын пырчим поген налаш сай игечым сөрваленна. Кажне пырчыжым арален улына, ложашат шөртнө акан лийын. А те – йол дене да эше лавырашке. Кузе йолда кошкен огыл?

Петр шортынат колтынеже ыле, но чытыш. Тиде жапыште Ванька толын пурыш. Кова тудымат колышаш шындыш. Вара Ванька кочаж нерген ойлыш. Тудыжо ончыч уныкажын йолжым күрлаш ямде лийын. Вара умылтарен, мо тугай кинде, кузе тудым пагалыман. Ванька Петян коваж деч прощенийым шортын йодо.

Кован шүмжө пушкыдо, йочалан кужун сырен ок керт. Тудо эрге-влакым өндаде, вара чайым йүаш үжө. Иван кузе ошман киндым кочмыж нерген каласкалыш, а Петр киндым йөршеш ом коч манын, чаманен каласыш. Прасковья киндым шулын, когыляныштат шуялтыш да каласыш:

– Кочса, тидым Юмо да мый веле ужам, но ме нигөланат огына ойло. Кочса, но эрелан ушышкыда пыштыза: кинде – тиде Юмын пөлекше, тиде вий, поянлык. Кинде – чылалан вуй!

Наталья АРТАМОНОВА.
Лидия АЛПАЕВА кусарен.

ИЛЫШЫШТЕ ЙОРАТЫМАШ МОТКОЧ КҮЛЕШАН



Ожно, пеш ожно ик отро улмаш. Тушто калыкын чыла чон шижмашыже-влак иленят: Куан, Шүлык, Палымаш да тулеч моло. Пеленышт Йоратымашат лийын.

Ик кечын ты отро вүд йымаке каяш тунгалын. Тидым чон шижмаш-влак шекланен шуктеныт да кажныже, писын шке пушышкыжо шинчын, отром кудалтен каен. Йоратымаш гына каяш вашкен огыл, тудо пытартыш тат марте отрон вүд үмбалан кодшашыжлан үшанен. Но йол йымалнысе мланде вүд дене койын теммеке, Йоратымаш пуренгаен кертмыжым умылен, полишым йодын кычкыраш тунгалын.

Воктечынже Поянлыкын шинчам йымыктарен чолгыжшо пушыжо ийын эрта улмаш. Йоратымаш Поянлыкым утараш йодын. Но тудыжо вашештен:

– Пушем ший-шөртнө да шерге арвер дене темын. Йоратымашлан тушто вер уке.

Йоратымаш мундырнак огыл ийше Кугешнымашым шке пушышкыжо налаш йодын. Кугешнымашын мутшо тыгай лийын:

– Пушышкем Йоратымашым пурташ гын, чыла шот-радам локтылалтеш. Сандене тыйым ом нал.

Йоратымаш чон йөсыж дене Шүлыкым утараш сөрвален.

– О Йоратымаш, мылам моткоч шүлык, пушыштем шкетын гына лийнем, – вашештен тудыжо.

Отро воктечын Куан ийын эртен. Тудыжо чот веселитлымыж дене Йоратымашын үжын кычкырымыжым колынат огыл.

Йоратымаш вучыдымын пеленак йүкым колын:

– Йоратымаш, тол тышке, мый тыйым пеленем налам.

Йоратымаш йүк велыш ончалын да чал вуян кугызам ужын. Чот куанымыз дене кугызан лүмжымат йодаш монден. Пуш гычын Мландыш волен кодмекыже гына тидын нерген шарналтен, но чал вуян кугызан пушыжо ты жаплан пеш мундырнө лийын. Тунам Йоратымаш Палымашым полшаш йодын:

– Моткоч палынем, каласе, кө мыйым утарыш?

– Утарышетын лүмжө – Жап, – вашештен тудыжо.

– Жап? – öрын Йоратымаш. – Молан лач тудо мылам полшыш?

– Илышыште Йоратымашын күлешан улмыжым Жап гына пала да умыла.

ХРИСТОСЫН КУАТШЕ ДЕНЕ ПОЛША!



Юмылан ўшаныше-шамыч коклаште святой мученик Трифон кугу пагалымашым сулен. Тудо кызыт Турций кундеммыш пурышо Апамеи ола деч тораште огыл верланыше Кампсада селаште шочын. Изиж годым комбым күтен. Шотан ешыште кушшо ты рвезылан самырыкше годымак Юмо деч кугу порылык пуалтын – тудо ия кучыман енын көргыж гыч осал шўлышым поктен луктеден да түрлө черым паремден кертын. Икана уло селасе калыкым святой рвезе шужен колымаш деч арален коден: пасуштышт чот пошышо да уло шурным пытарен кертше осал копшанге-шамычым шке молитваж дене поктен колтен.

Тыгак тудо рим император Гордианын (238-244) ўдыржым паремдымыж дене кумдан чапланен. Кугыжан мотор, ушан самырык ўдыржө ия кучыман лийын да чот орланен. Шуко ең эмлаш төчен, но нигөат полшен кертын огыл. «Мыйым Трифон веле поктен луктын кертеш» манын, саде ия икана ўдырын көргыж гыч кычкыралын. Императорын ўдыржө деке ынде Трифон лўман шуко мастарым кондеденыт, нунын дечат шот лектын огыл. Латкуд ияш святой рвезе нерген пален налмек, тудым Римыш ўжыктеныт. Трифонлан ола марте эше кум кече толаш кўлмө годым осал шўлыш чытен кертын огыл, ўдырын көргыж гыч шке лектын.

Святой Трифоновым император деке кондеденыт, но ўдыржө кум кече ончык паремынат, Гордианым кокытеланымаш авалтен. Тунам кугыжа осал шўлышым шкаланжак ончыкташ Трифон деч йодын. Рвезе куд кече пенгыде пўтым кучен, чот кумалын да иялан калык ончык лекташ кўштен.

Святитель Димитрий Ростовскийын (†1709) Четы-Минейыштыже тидын нерген тыге возымо:

– Святой Трифон Святой Шўлыш дене темын, молылан койдымо ия ўмбак ушакыл шинчаж дене тўткын ончен да каласен: «Осал шўлыш, мый тыланет Господь Иисус Христосын куатше дене кўштем, тыште улшо-шамычлан шке намысле тўсетым ончыкто».

Тунам диавол чылаштан шучко шем пийын тўсыж дене кончен, шинчаже тулла йўлен, а вуйжым мландымбалне веле шўдырен. «Юмын пўрымө айдеме көргыш кузе пураш тоштынат?» – йодын туддеч святой Трифон.

– Христиан-шамычым орландараш властем уке, но кө шке осал кумылшупшамыше почеш кая да мыланна йөрышым ышта, тудо мемнан кидыште лиеш, – вашештен ия.

Тыгай чудым ужмеке да иян вашмутшым колмеке, тушто улшо-влак кокла гыч шукушт Христослан ўшанаш тўналыныт да идоллан кумалмышт деч шөрленыт. Императорын пуымо чапле чыла пөлекым святой Трифон корныштак ең-шамычлан пуэден пытарен да мөнгыжө яра пөртылын, вет орланыше-шамычлан полшымыж годым тудо акым налын огыл, иктым веле йодын:

– Иисус Христослан ўшаныза, вет мый Тудын порылык куатше полшымо дене эмлем!






Шуко жапат эртен огыл, кугыжан престолыш император Декий (249–251) шинчын, тудо христиан-шамычым чот поктылаш тўналын. Святой Трифонын Христос нерген лўдде туныктымыжо да шуко еным Тынеш пураш савырымыж нерген епарх Акилинлан каласен шуктеныт. Кугыжан кулжо-шамычын тудым кычалмым пален налмекше, святой Трифон шылын огыл, поктылшо-шамыч деке шке лектын. Рвезым Никея олашке епарх Акилин деке допросыш кондеденыт. Тўрлө семын лўдыктылыныт гынат, Христослан ўшанымыж нерген самырык Трифон лўдде ойлен.

Тунам епарх тудым пушенгыш сакаш да кум шагат кыраш кўштен. Святой рвезым кузе гына орландарен огытыл: тоя дене кыреныт, кўртнө гыч ыштыме кўч дене удыреныт, сусыржым тул дене йўлалтеныт, йолышкыжо пудам кырен, ола мучко коштыктеныт. Вара сонарыш кайыше епархын имньыж деке кылдеденыт. Имне почеш ошкылшо святой Трифон пророк Давидын псаломжым мурен: «Мыйын йолем Шке йолгорнет дене коштыкто, йолем йонгылыш ынже тоштал ыле. Корнем-шамыч Тыйын чыныш лукмашкет викарталтыт ыле гын, Тунам Тыйын чыла кўштымет-шамычым ончалам гынат, ом вожыл ыле». Тыгак тудо, шке порылыкшым палдарен, икымше орланыше святой архидиакон Стефанын мутшым пачаш-пачаш ойлен: «Господь! Тиде языкыштан нуным ит титакле».

ФЕВРАЛЬ. ЧЕРКЕ ПАЙРЕМ

ПН	ВТ	СР	ЧТ	ПТ	СБ	ВГ
	1	2	3	4	5	6
7	8	9	10	11	12	13
14	15	16	17	18	19	20
21	22	23	24	25	26	27
28						

11 - Дни особого поминовения усопших
 - сплошные седмицы
 - постные дни

 Разрешение на пищу без растительного масла
 Разрешение на пищу с растительным маслом
 Разрешение на рыбу
 Разрешение на вино
 Разрешение на пиво
 Полное воздержание от пищи

1 – Преподобный Макарий Великий ден Ефессын святительже Маркын кечышт. Москон да уло Российын Святейший Патриархше Кириллым троныш шындыме кече.

2 – Преподобный Евфимий Великийын кечыже.

6 – Руш Черкысе новомученик ден исповедник-влакын погынышт. Христос верч орланен колышо-влакым уштымаш.

Петербургысо поро пиалан Ксения аванан кечыже.

7 – Святитель Григорий Богослов ден Киевысе священномученик Владимирын кечышт.

9 – Святитель Иоанн Златоустын кечыже.

11 – Священномученик Игнатий Богоносецын кечыже.

12 – Василий Великий, Григорий Богослов ден Иоанн Златоуст святитель-влакын кечышт.

15 – Господь Иисус Христосым Вашлийме (Сретенье) пайрем.

16 – Апостол-влак дене төр улшо Николай Японскийын кечыже.

Марий кундеммысе священномученик Адриан Троицкийын кечыже.

18 – Юмын Аван «Илышыште йомшо-влакым Кычалше» иконыжын кечыже.

22 – Иркутскын святительже Иннокентий ден Москон святительже Тихонын кечышт.

25 – Юмын Аван Иверский иконыжын да Москон святительже Алексийын кечышт.

26 – Колышо-влакым уштымаш.

27 – Апостол-влак дене төр улшо Кириллын, славян калыкын туныктышыжын, кечыже.

Чот орландарымышт годым Трифон ончыко Суксо волен, кидыштыже шергакан вуйшудыш лийын. Тидым ужын, шукашты лудыныт, Акилин гына эшеат чот шыдешкен. Чыла индырымашым йук лудке чытыше рвезым йудлан казаматыш петыренит. Эрлашыжым адак кужун орландареныт да керде дене руал пуштыныт манын шонат. Трифон колымыж деч ончыч Юмылан кумалын, орлыкышто пенгыдемдымыжлан Тудлан таум ыштен да колымыж деч вара шкенжым сөрвалыше-шамычлан полшен керташ Господь деч порылыкым йодын. Ожнысо Житиеште святойын ты йодмашыж нерген тыге возымо: «Чонемым тынысын нал, мыйын лумемым шарнен, Тыланет Святой Жертвым кондышо-влакым Шке Святой кукшытет гыч колышт, умбакышт Шке Святой Суртет гыч ончал, нунылан пытыдыме полкекым тичмашын пу, вет Тый Икте Поро да Чаманыде Пуышо улат курым-курумеш!» Святой чонжо тынысын лектын да тудын вуйжым руалме деч ончычак Господь деке куснен. Тиде Никея олаште 250 ийыште лийын.

Мученик Трифоном христиан-шамыч ты олаштак тойынешт улмаш, но тудо нунылан кончен да капшым шочмо Кампсада селаш нангаш кустен. Тудын кумылжым шуктеныт. Икмыняр жап гыч мощыжым ончыч Константинополь олаш, а тушеч варажым Римыш нангаеныт. Святой мученикын вуйжо Черногорийысе Котор олаште святой Трифон лумеш кафедральный соборышто аралалтеш. Тушечын 1803 ийыште мощын ужашыжым Российыш конденит, святыным кум изи ковчегыш пыштеныт да святойын иконышкыжо веранденыт.


Лудшо енгын йодышыжо лектын кертеш: «Молан вара святой мученик Трифонын юмогаштыже шукаж годым эше кайыкым ончыктат?» Тидыже Руш Православный Черкыште кумдан шарлыше

ик историй дене кылдалтын да ты святойым кугун пагалаш эше ик сай амал лийын. Сонарыш коштымышт годым Иоанн Грозныйын (1533-1584) йоратыме арсланже ала-куш торах чонгештен да портылын огыл. Сокольник Трифон Патрикеевлан кугыжа шыдын каласен: «Арсланым от му гын, вует руалме лиеш». Кайык ончышо ты енет ятыр вере кычал коштын, пагалыме святойжым – мученик Трифоном – шке семынже эре сөрвален. Ойгырен да кычал ярнымек, кумшо кечын каналташ возын. Омыштыжо ош имне умбалне шинчыше самырык рвезе кончен, кидыштыже кугыжан йоратыме арсланже лийын. Тудо кидшым шуен да манын: «Ит ойгыро, йомдарыме кайыкетым нал да Юмо дене пырля кугыжа деке кай». Сокольник помыжалтын, пунчо укшышто шинчыше арсланым ужын. Кайыкым кучен, кугыжалан нангаен да святойын полшымыж нерген каласкален. Шкеже, таум ыштен, орланыше Трифон лумеш ончыч часамлам чонен, икмыняр жап гыч – черкым. Москошто чонгымо ожнысо ты черке кызытат почмо, тудо Рижский вокзал могырышто верланен.

Мученик Трифонын вашке полшымыж нерген Азъял-Потьал черкын ончычсо настоятельже протоиерей Владимир Захаров деч ятыр гана колалтын. Паренте саскам колорад копшанге пытара манмылан тудо воштылеш веле ыле: «Могай колорад копшанге нерген ойлыштыда, ме мученик Трифонлан молебным служитлена, святой вудым шыжыктена – мемнан дене нимогай копшанге уке», – манеш ыле. Чылажат ушан дене йодмо деч шога. Түрлө брыктарыше чудыжо ушанымаш почеш лиеш, Господь Шкежат лишне, святойжо-влакын йодмышт почеш Тудо Шкежак полша.

Апамейысе святой мученик Трифоном жаплыше енг-влак да уло Черке тудым 1/14 февральыште пагален шарнат.

Куанен чиялтена



ЮМЫЛАН ПӨЛЕК

• Ёжыктен Юмо Шкеж дек ик кечын
 • Шүдө суксым. Күштен каласен:
 • «Кондыза мыланем те пөлекым».

• Мландываке чылаштым колтен.
 • Волат нуно шыпак пырля йүдым.
 • Шүдө суксо ойырлат түрлө век,
 • Вет муаш күлеш чапле пөлекым,
 • Намиаш Юмо дек жап шумек.
 • Ёжыктен нуным угычын Юмо,
 • Но ик суксо уке, вот азап...

• Моло дене шуктен огыл тудо
 • Мөнгө пөртылын, шуын кеч жап.
 • Кучыкта кажныжат шке пөлекшым –
 • Вет тыршеныт моткоч чыланат.
 • Мокталта Тудыжат вашеш нуным,
 • Толын лектын вараш кодшынат.
 • Кидкопаш конден тудо пөлекым,
 • Кормыжтен, йомдараш лүдмыж ден:
 • «Конденам мый Тылат шинчавүдым,
 • Ик чүчалтышым шортшо ег деч.
 • Кольым мый, сөрвален шортын тудо,
 • Касараш йодын языкшым пеш».

• Шуялта Юмо дек кидшым суксо –
 • Шинчавүд эр лупс гай йылгыжеш.
 • Шоналтен каласа вара Юмо:
 • «Пөлекда кажныдан мотор тек,
 • Но вот шортын сөрвалыше егын
 • Шинчавүдшө – эн шерге пөлек».

Лидия АЛПАЕВА.

Юлсер кундем.

ЙОДЫШЛАН ПРОТОИЕРЕЙ НИКОЛАЙ ЧУЗАЕВ ВАШЕШТА.

Иззи эргымым пел ий ончыч тынеш пуртышна,
 но тиддеч вара ик ганат Пырчесым
 подылташ намиен омыл. Авам «Пырчесым шужен
 мўшкыреш гына подылтыман» манеш. А эргымже
 эше кок ийымат темен огыл, эрдене 6 шагатлан
 шөрым йүэши. Шкат умыледа, Литургий годым
 Пырчесым подылтымо жапым шуко вучыман.
 Мылам кузе лийман? Эргымым Пырчесым подылаш
 кузе ямдылыман? Ольга.

Поро кече, Ольга. Шкендадат, йочадамат ида
 орландаре: изи йочам Пырчесым подылмо жап
 деч ончычат йүкташ-пукшаш лиеш. Шужыктен
 вучыктымо дене те тудын уш-акылжыланат,
 капкылжыланат энгекым веле ыштеда. Икшывым
 5-7 ияш гыч эркин-эркин кугуенг семынак
 Пырчесым подылаш чын ямдылалташ туныктыман:
 кочмо-йүмым чыташ, молитвам лудаш, койыш-
 шоктышым шекланаш. Вес гана иктаж йодышда
 лектеш гын, вигак шкендан духовник деке кайыза.
 Тудо чыла раш умылтар.

ЙОДЫШ-ВАШМУТ

"ШҮМ-ЧОН ИЗОЛЫК" МАРИЙ ПРАВОСЛАВНЫЙ ЖУРНАЛ
Учредитель: "Руш Православный Черкын Йошкар-Оласе да
 Марий Элысе епархийже (Московский Патриархат)" религиозных
 организаций.

Журнал зарегистрирован Управлением Федеральной службы
 по надзору в сфере связи, информационных технологий и
 массовых коммуникаций по Республике Марий Эл, свидетельство
 о регистрации ПИ № ТУ 12-0164 от 12 декабря 2013 года.

Тираж: 1500 экз. Формат - А-4-12.

Журнал лекме жап - 1.02.2022 ий.

0+ - знак информационной продукции согласно ФЗ от 29.12.2010
 г. №436-ФЗ.

Журналым редакцийште погымо да верстатлыме, «Куранты» ООО-
 што ямде оригинал-макет гыч савыктыме. Адресше: 429029, Татарстан,
 Казань, Сибирский тракт урем, 34, 14 корпус, 42-шо пөлем.

Редакцийын да издательын адресышт: 424000, Йошкар-Ола,
 Вознесенский урем, 81, 224-ше пөлем.
Тел.: (88362) 45-39-54.

E-mail: marlagazet@mail.ru

Тўн редактор: Н.В. Чузаев (протоиерей).

Редакционный совет: И.А. Сапаев, Д.В. Смирнов,
 А.Н. Таныгина, А.П. Чемекова, А.В. Эманова.

Компьютер дене келыштарыше: Д.В. Смирнов.

Ак - кутырен келшыме почеш. Авторын да редакцийын
 шонымышт түрлө лийын кертыт. Серыш-влак мөнгеш огыл
 колталт.

РЕДАКЦИЙ ЙОДЕШ: ЖУРНАЛЫМ ШАЛА
КЫШКЫЛТАШ ОГЫЛ. ЛУДЫНАТ - ВЕСЫЛАН ПУ!